



Bosnia and Herzegovina  
Federation of Bosnia and Herzegovina

**CANTON SARAJEVO  
ASSEMBLY**

Nezavisni odbor  
14.02.2019.godine

**SAOPŠTENJE ZA JAVNOST**

Nezavisni odbor Skupštine Kantona Sarajevo smatra da je dužan da se obrati javnosti povodom neutemeljenih optužbi, insinucija, poluinformacija i netačnih informacija iznesenim u brojnim medijskim gostovanjima policijskog komesara MUP-a KS.

Prije svega osvrnućemo se na iznesenu optužbu da je Nezavisni odbor Skupštine Kantona Sarajevo očito pod političkim uticajem.

Pored činjenice da se ova optužba iznosi tek nakon saznanja za ocjenu „nezadovoljava“, želimo napomenuti da se praktično radi o istom sastavu Nezavisnog odbora koji je tadašnjeg načelnika sektora uniformisane policije G-dina Mevludina Halilovića (pored još jednog kandidata) izglasao i predložio tadašnjoj Vladi KS za poziciju policijskog komesara MUP-a KS (uz izmjenu samo jednog člana Nezavisnog odbora). Dakle, pokušava se nametnuti teza da praktično isti Nezavisni odbor "nije bio" pod političkim uticajem kada je predložio G-dina Halilovića na poziciju policijskog komesara, a da je sada taj isti Nezavisni odbor pod političkim uticajem jer je dao **ocjenu rada istog za 2018. godinu "nezadovoljava"**. Smatramo da je svaki daljnji kometar po ovom pitanju suvišan.

Želimo podsjetiti javnost da je G-din Halilović došao na mjesto smjenjenog policijskog komesara, te da se od njega očekivalo da izvrši opsežnu reformu rada unutar Uprave policije i da napravi vidan progres u njenom radu, a koji prije svega treba dovesti do toga da Uprava policije prestane baviti posljedicama i počne baviti prevencijama, a činjenica je da se na tom polju jako malo uradilo o čemu ćemo javnost detaljno informisati u narednom periodu.

Potpuna je neistina da policijski komesar nije znao za održavanje sjednice Nezavisnog odbora te da istoj nije prisustvovao. Nezavisni odbor svoje sjednice zakazuje u skladu sa Poslovnikom o radu istog najmanje 7 dana prije održavanja iste i poziv za sjednicu je uredno dostavljen policijskom komesaru, koji je i prisustvovao sjednici. Radi se o čistoj koincidenciji da se sjednica održana dana 12.02.2019. godine (a koja je najavljena 7 dana prije) održavala u isto vrijeme kada je objavljena informacija o likvidaciji Edina Gačića (o informaciji o likvidaciji Nezavisni odbor je saznao u toku same sjednice i to od policijskog komesara koji nije prisustvovao istoj?!). Poslovnik o radu Nezavisnog odbora ne predviđa mogućnost prekidanja sjednice ukoliko postoji kvorum za rad i odlučivanje na istoj. Dakle, nisu postojale formalne pretpostavke da se sjednica prekine,



web: <http://skupstina.ks.gov.ba>  
e-mail: [skupstina@skupstina.ks.gov.ba](mailto:skupstina@skupstina.ks.gov.ba)  
Tel: + 387 (0) 33 562-044,  
Fax: + 387 (0) 33 562-210  
Sarajevo, Reisa Džemaludina Čauševića 1



stoga je Nezavisni odbor u skladu sa Poslovníkom o radu završio svoj rad razmatrajući sve tačke dnevnog reda, uključujući i prijedlog ocjene rada policijskog komesara za 2018 godinu. Donošenje prijedloga ocjene rada je obaveza Nezavisnog odbora u skladu sa odredbama Zakona o unutrašnjim poslovima Kantona Sarajevo i ista je trebala biti razmatrana i na prethodnoj sjednici održanoj 29.01.2019. godine, ali uslijed nedostatka kvoruma je odloženo izjašnjavanje o čemu je javnost imala prilike da se upozna u medijima. Policijski komesar u skladu sa Zakonom o unutrašnjim poslovima KS ima pravo da po prijemu našeg prijedloga ocjene sa obrazloženjem, razmotri sve činjenice navedene u istom i da svoje pisano izjašnjenje dostavi Vladi KS.

Nejasno je kako i na temelju čega je policijski komesar (jer još uvijek nije dobio prijedlog ocjene rada sa obrazloženjem od strane Nezavisnog Odbora) sebi dao za pravo da iznosi brojne komentare, netačne navode i optužbe u brojnim medijskim nastupima. U vezi sa izjavama u medijskim nastupima, iznošenjem neistina, poluistina i neutemeljenih optužbi, Nezavisni odbor će u skladu sa svojim ovlaštenjima izvršiti analizu istih i utvrditi da li postoji neki od osnova za pokretanje disciplinskog postupka protiv policijskog komesara MUP-a KS zbog povrede službenih dužnosti.

Na sjednici Nezavisnog odbora održanoj 12.02.2019. godine, jedna od tačaka dnevnog reda bila je i **prijedlog ocjene rada policijskog komesara za 2018. godinu**. Dešavanja u vezi sa pronaskom i likvidacijom Edina Gačića obzirom da su se desila u 2019. godini nisu bila predmetom rasprave niti ocjenjivanja rada, **jer ocjena rada u 2018 godini nema apsolutno nikakve veze sa ovim događajem**, a kako se to spinovanjem pokušava dovesti u neposrednu vezu. Pronalazak i likvidacija počionioca ubistava, Edina Gačića, je izvedena profesionalno i za svaku je pohvalu aktivnost u kojoj su učestvovala brojne sigurnosne agencije i institucije.

Posebno naglašavamo činjenicu da je prijedlog ocjene rada policijskog komesara za 2017. godinu od strane Nezavisnog odbora bio "zadovoljava" ali sa iznesenom rezervom. Nezavisni odbor prilikom davanja ocjene za 2017. godinu je taksativno naveo određene nedostatke u radu u 2017. godini za koje smo se nadali da će biti otklonjeni tokom 2018. godine, a što se nije dogodilo.

Na kraju želimo podsjetiti javnost, da je identične optužbe prema Nezavisnom odboru iznosio i raniji (smjenjeni) policijski komesar. I tada je ovaj isti Nezavisni odbor kao i sada bio pod ogromnim pritiskom, i tada se sa raznih strana davala bezuvjetna podrška radu policijskom komesaru bez da se pročitalo i slovo obrazloženja tadašnjeg prijedloga Nezavisnog odbora za smjenu policijskog komesara. I tada su svoja mišljenja o radu i članovima Nezavisnog odbora, političkom uticaju, kompetencijama, stručnosti istog u medijskom prostoru iznosili razni eksperti iz oblasti sigurnosti, razni sigurnosni analitičari a neizostavno i razni političari. O svim tadašnjim optužbama, o političkom uticaju, o stručnosti/nestručnosti i u konačnici odgovor o tome da li je Nezavisni odbor radio svoj posao u skladu sa zakonom ili ne jasno je u svojim presudama odgovor dao Opštinski sud u Sarajevu, a o čemu je javnost već informisana.

Nezavisni odbor će u narednom periodu sačiniti obrazloženje jednoglasno usvojenog **prijedloga ocjene rada policijskog komesara za 2018. godinu** i u skladu sa zakonom istu uputiti u dalju proceduru o čemu će javnost biti blagovremeno obaviještena.



web: <http://skupstina.ks.gov.ba>  
e-mail: [skupstina@skupstina.ks.gov.ba](mailto:skupstina@skupstina.ks.gov.ba)  
Tel: + 387 (0) 33 562-044,  
Fax: + 387 (0) 33 562-210  
Sarajevo, Reisa Džemaludina Čauševića 1

